

Gobierno a decreta 6 di november como fecha nacional

Pa recorda tur heroe cu a perde nan bida durante e di dos guerra mundial

PA prome biaha Gobierno a decreta e fecha di 6 di november como e fecha nacional pa recorda e heroenan cu a perde nan bida durante e Di Dos Guerra Mundial. Diaranson mainta, Fundacion Parke Boy Ecury a celebra e fecha aki den grandi den presencia di Gobernador di Aruba, Su Excelencia Alfonso Boekhoudt, Presidente di Parlamento, Raymond Kamperveen, Prome Minister Evelyn Wever Croes, Minister di Cultura y Finansa, Xiomara Maduro, representantenan di Parlamento di Aruba y invitadonan special.

Prome Minister a indica cu e fecha di 6 di november a bira un realidad danki na e peticion cu Fundacion Parke Boy Ecury a haci na Gobierno di Aruba y Gobierno a cumpli cu nan deseo y a decreta fecha 6 di november como e dia pa recorda e heroenan cu a perde nan bida durante di 'Di Dos Guerra Mundial'.

Riba e fecha aki Aruba ta para keto y recorda tur e heroenan Di Dos Guerra Mundial pero specialmente Boy Ecury ken tawata parti di e resistencia Hulandes y na edad di 22 aña a wordo fusila na Hulanda pa su trabounan di resistencia y asina el a muri como un heroe y no como un traidor. Aruba semper lo recorda e frase di Boy Ecury; *"Den cas di mi tata, no tin luga pa traidor"*.

"Mi ta felicita y gradici e fundacion pa e trabou importante cu nan ta haci. E ta un bunita parke cu ta refleha historia di Aruba desde tempo di Antias y ora cu nos a haya nos Status Aparte. Ta trata di un iniciativa priva di señor de Veer y e fundacion, y Gobierno di Aruba ta hopi contento y satisfecho cu esaki. Un dia manera awe laga nos para keto y balora e hendenan cu a entrega nan bida pa awe nos por biba den libertad. Laga nos stima, cuida, balora y conserva e libertad aki. Mi deseo ta pa cada un di nos como ser humano, como Arubiano orguyoso cu nos ta, sigui demostra tolerancia, den tur faceta di nos bida diario, di e cosnan mas chikito pa e cosnan mas grandi. Ban respeta e derecho di otro, pasobra ta e ora ey so nos por tin paz. Ohala cu awe nos cada un por reconfirma nos compromiso cu paz, y asina demostra cu e sacrificio ultimo di esnan cu a perde nan bida den guerra, no tabata en vano", Prome Minister a expresa.

